





弇州山人四部稿卷之一百六十三

吳郡王世貞元美著

說部

宛委餘編八

愚嘗恠南燕慕容德登高讌羣臣語如齊魯固多君子當昔全盛之時接慎巴生淳于鄒田之徒蔭脩檐臨清沼馳朱輪佩長劍恣非馬之雄辭奮談天之逸辨指麾則紅紫成章俛仰則丘陵生韻至於今日荒草頽墳氣消烟滅永言千載能不依然又如曹景宗既貴謂所親曰我昔在鄉里騎快馬如龍與少年輩



身州山人稿卷之百十三  
數十騎拓弓弦作磬聲箭如餓鴟數中澤中逐麋  
數肋射之渴飲其血饑食其胃甜如甘露漿覺耳後  
生風鼻端出火此樂使人忘死今來揚州作貴人動  
轉不得路行開車幔小人輒言不可開置車中如三  
日新婦此邑邑使人氣盡此等語雖小愧大雅殊自  
奇麗德索虜景宗武人其能言尤可恠耳昔人謂史  
臣借飾之語恐亦未然

晉文卽位探策得一羣臣失色裴成公進曰臣聞天  
得一以清地得一以寧侯王得一以爲天下貞梁高  
祖問王侍中朕爲有爲無對曰陛下應萬物爲有體

至理爲無宋文帝釣天泉池垂綸不獲王景文曰臣  
以爲垂綸者清故不獲貪餌元魏高祖名子恂愉悅  
懌崔光名子劭勗勉高祖曰我兒名傍皆有心卿兒  
名傍皆有力對曰所謂君子勞心小人勞力周武自  
彈琵琶屬梁王蕭巋舞因起謝曰陛下旣親撫五絃  
臣敢不率同百獸此雖取捷供奉語不妨雅致若桓  
玄卽位御牀陷而殷仲文曰將由聖德深厚地不能  
載梁武宮門災謂羣臣我意方欲更新之而何敬容  
曰此所謂先天而天弗違又武帝卽位有猛虎入建  
康郭象入江陵上意不悅以問羣臣羣臣無敢對者



王瑩在御筵歛板對曰昔擊石拊石百獸率舞陛下  
膺錄御圖虎象來格縱極澹辭不能令人不嘔穢

○今世所稱返璧蓋左傳所謂受殮而返璧也若以  
周敬王事擬之則佳秦始皇事擬之則不雅子朝與  
敬王戰投璧於河後二日津人得之於岸將賣之石  
也已敬王事定獻之復爲王秦使者夜過華陰平舒  
道有人持璧遮使者曰爲我遺鎬池君因言曰今年  
祖龍死使者奉璧具以聞使御府視璧乃二十八年  
行渡江所沈璧也

西京雜記茂陵富人袁廣漢於北邙山下築園東西  
四里南北五里又何武葬北邙山薄龍坂東王嘉冢  
東北一里然則長安故自有北邙不止洛中也今考  
志記俱無之

書稱歸馬華山之陽放牛菴林之野蓋官不復錄爲  
兵車用置之民間聽其耕牧而已程大昌因其地在  
河山阨束取孔穎達引杜預爲證云華山之旁尤乏  
水草非長養牛馬之地欲使自生自死腐儒穿鑿一  
至於此不知革車三百兩爲馬千二百疋所須地幾  
何可發一咲

漢文帝臨厠帝昭所謂夾二水而臨其岸也慎夫人



如廁與武帝據廁見衛青溷廁之廁也

立仗馬據顏魯公疏以爲起自太宗其門司式曰無門籍有急奏令仗家引對不得關礙防壅蔽其立仗馬二須乘者聽程大昌以爲太宗招言勤政至意至開元天寶禮儀立仗馬李林甫所云一鳴輒斥卽今仗馬制也而招言勤政之意失矣按此馬及仗當在外朝人主行幸它所或深宮而所謂急奏者必上變告警之類耳若方御朝豈有乘馬徑入理且必不以是待上言時事者也白虎樽尚有發者而竟太宗朝不聞乘仗馬奏事人大昌之說恐亦無據

晉史袁彥伯宏在桓公府作東征賦而不及宣城一曰桓命同載問卿何以東征賦不及家君袁云尊公稱謂旣非下官敢專旣未遑啓不敢顯之耳公疑不實乃曰君欲爲何辭袁應聲曰風鑿散朗或搜或引身雖可忘道不可隕宣城之節信義爲允桓泫然而止又世說新語彥伯東征賦都不道陶公胡奴誘之狹室中臨以白刃云先公勲業如是何以相忽略袁窘蹙便答我大道公何以云無因誦曰精金百鍊在割能斷功則在人職思靖亂長沙之勲爲史所讚按此必有一誤彥伯豈有爲桓客而遺宣城者使出無



意則伏玄度已言之若使出有意不足見才而適來  
覺臆或胡奴之說差爲近之

今人知司馬長卿爲賦客而不知爲經術士又不知  
爲文翁弟子也按秦宓傳宓云蜀本無學士文翁遣  
相如來受七經還教吏民由是蜀學比於齊魯故地  
里志曰文翁倡其教相如爲之師又云雖有王孫之  
累猶孔子大齊桓公羊賢叔術宜立祠堂速定其銘  
○每讀楞嚴經云貪明爲罪遇精爲形名題題鬼和  
銷報盡生於世間多爲應類酬足爲人叅合文類貪  
成爲罪遇明爲形名役使鬼明滅報盡生於世間多  
爲休徵酬足爲人叅合明類不免一自哂吾儕豈亦  
貪明貪成之報耶然據佛氏言則帝釋天福盡尚墮  
五通僊見身有盡一應神道俱屬脩羅閻羅主者亦  
是業報固無恠也

劉向識貳負桎梏之尸蓋僵尸數千年不朽者也鄆  
溪水側有重人穴穴中有僵尸不知年載按記云人  
以五月五日生者尸不腐

今人正五九月不上任唯京朝官則不拘也在唐宋  
亦然按戴植鼠璞云釋氏智論天帝釋以寶鏡照四  
大神州每月一移察人善惡正五九月照南瞻部洲



唐人以此三月不行死刑曰三長月節鎮因戒屠宰  
不上官宋人多以是三月食素誦經已可咲矣今於  
正五九月不斷屠宰但不上任尤無謂也

今人稱法令曰令甲以漢宣帝詔令甲死者不可生  
然是法令首卷曰江充傳註令乙騎乘行馳道中章  
帝詔曰令丙箠長有數見鼠璞甚明然則令乙者第  
二卷也令丙者第三卷也漢律當有十卷

曲逆縣按博水濡水自源東逕其縣故城南枉渚迴  
湍率多曲復亦謂之爲曲逆水張晏曰湍水於城北  
曲而西流是受此名而氏曲逆矣左傳哀四年齊國  
夏伐晉取曲逆又竹書紀年魏殷臣趙公孫裒代燕  
返城曲逆漢高帝以封陳丞相貪其富而不辭亦不  
求改名至王莽始改爲順平矣

地里志言高奴縣洧水上有肥可用之博物志言酒  
泉南壽縣南山出泉水大如筥注池爲溝水有肥如  
肉汁取著器中始黃後黑如凝膏然極明與膏無異  
膏車及水碓缸甚佳北方謂之石漆又云水肥水經  
注銅雀臺北曰水井臺高八丈上有冰室室有數井  
深十五丈藏水及石墨焉石墨可書又然之難盡亦  
謂之石炭陸士龍貽兄書三臺上曹公藏石墨數十



萬斤云燒此消後可用然烟中人不知兄頗見之否  
今送二螺卽此物也

水經注言犍爲朱提縣山水險奇數百言而不及朱  
提銀事亦一漏也朱提銀比之他銀極貴價可益十  
之五見食貨志武帝時以銀爲幣至平帝而始有朱  
提銀耳周穆王時有燭銀其光可鑒曰天子之寶蓋  
不以爲幣也

余欲登太和山閱近所刻志不能舉永樂以前事及  
山所由名攷一統志亦無之按道元水經注云武當  
山一曰太和山亦曰叅上山山形特秀又曰僊室又

荊州圖副記曰山形特秀異於衆嶽峯首狀博山香  
爐亭亭遠出藥食延年者萃焉晉咸和中歷陽謝允  
捨羅邑宰隱遁斯山故亦曰謝羅山

余過襄陽城之十餘里爲習家池不能二畝許乃是  
流泉滙而爲池耳前半里許俯大江按水經注沔水  
逕蔡洲與襄陽湖水合水上承鴨湖東南流逕峴山  
西流東南流注白馬陂水又東入侍中襄陽侯習郁  
魚池郁依范蠡養魚法作大陂陂長六十步廣四十  
步池中起釣臺池北亭郁墓所在也列植松篁於池  
側沔水上郁所居也又作石伏逗引大池水於宅北



作小魚池池長七十步廣十二步西枕大道東北二邊限以高堤楸竹夾植蓮芙蓉覆水是遊宴之名處也山季倫之鎮襄陽每臨此池未嘗不大醉而還恒言此是我高陽池故人爲之歌曰此公出何去往至高陽池日暮倒載歸酩酊無所知然則今之習池非復昔之舊矣又其地高不可引湖水

用脩以方城爲萬城其可咲不待言伯晦引史記阻之以鄧杯緣之以方城又我悉方城外及服虔杜預之說以關之似矣然不如盛弘之荊州記之明切也其云葉東界有故城始隼縣東至瀨水達泚陽界南北聯聯數百里號爲方城一謂之長城南北雖無基築皆連山相接而漢水流其南故屈完云云何其易曉也郡國志葉縣有方城郭仲產曰苦菜于東俱有方城又楚狂接輿耕於方城之南蓋皆傍此長山方城而名者也

左氏焚巫尪謂其尪瘦鼻孔向上天憫之不爲雨以故焚巫其言極俚可咲然古有祈雨而焚身者蓋不但焚巫也桂陽先賢畫讚臨武張喜字季智爲平與令時天下大旱喜乃積柴自焚主簿崇小史張化從喜焚焉焚後靈雨澍應又濟北戴封字平仲爲西華



令旱乃自焚天雨火滅官至太常後之焚身者僧也  
○余往者赴晉陽臬踰上黨見刻石有孔子迴車處  
辨以孔子臨河而返必不至其地於紀行筆之矣及  
覽酈道元水經註云諸子史籍之文竝言仲尼臨河  
而歎是非太行迴轅之言也然又云邗水東南逕孔  
子廟東廟庭有碑魏太和元年孔靈度等以舊字毀  
落上求脩復野王令范衆愛河中太守元真刺史咸  
陽公高允表聞立碑於廟則其事亦已久矣今廟與  
碑俱不存後人緣而刻此五字也

歷山有三處一統志云濟南城南五里有歷山卽舜  
耕處鄭康成謂歷山在河東而曾子固辨其非子固  
似未讀水經也按酈道元註云河東郡南有歷山謂  
之歷觀舜所耕處也有舜井媯汭二水出焉南曰媯  
水北曰汭水迺逕歷山下上有舜廟又周處風土記  
曰舊說舜葬上虞又記云耕於歷山而始寧剡二縣  
界上舜所耕田於山下多柞樹吳越之間名柞爲櫪  
故曰歷山道元謂周處此志爲不近情傳疑則可證  
實非矣安可假木異名附山殊稱彊引大舜歷山媯  
汭言是則安於彼乖矣然則寧剡尚在傳疑濟南猶  
似無據



每見人稱前導者伍伯晉書賈充戲庾純云君行常在  
在人前今何以後蓋純之先人有爲伍伯者按古今  
注云一伍之長也五人爲伍曰伍伯一曰戶伯漢制  
兵吏五人一戶一竈每竈四直一伯故曰戶伯又曰  
大伯諸王公行戶服赤幘纁衣常鞅率其伍以導引  
也

用脩著赤牘清裁旣不序赤名所以唯於秬林伐山  
載禽經云騅上無尋鷄上無常雉上有丈鷄上有赤  
云赤與尺通莊子云斤鷄斤亦尺也此其所以謂之  
赤牘歟然則謂之斤牘亦可乎按漢西嶽石闕銘云

弘農太守常山元氏張勳爲西嶽華山作石闕高二  
丈二赤又北齊平等寺碑云銅像一軀高二丈八赤  
廣州記稱鰕鬚長四赤然則赤果與尺通也余故於  
廣赤牘改正作尺而記於此以見用脩未覩二碑也  
○用脩稱天子三河募少年爲黃河折支河湟中河  
大可咲也此三河那得有少年募蓋河內河東河南  
近京師地耳

史記曹參傳蕭何爲法顛若畫一徐廣註音古項反  
一音顛漢書則云講若畫一文頴註講或作較顛訓  
直又訓明講訓和溫公通鑑遽改作較用脩譏之似



也却又妄改顛作斟而云勘斗斛也較車耳也則用脩尤爲可咲史記本文原無作斟註亦無勘斗斛訓且較之一字豈車耳之外別無訓乎留侯傳史記作帷帳漢書作帷幄今亦以責之通鑑疑用脩不曾見漢書也

又云漢書遊於巖郎鍾繇表廟郎郎當作廊而皆省作郎者上廡下下承上也此却不然龜策傳紂爲象郎豈亦下承上乎蓋古文通用耳

用脩能辨晉元非牛金所生且知其爲誣辭而云魏道武名犍繼受命爲牛繼馬後之像此又誤也道武初名涉圭後名珪犍者其父什翼犍也亦遠矣

唐人記宋延清二事吾皆疑之其一謂延清夜投杭州靈隱寺得句云鷺嶺鬱岩崑龍宮隱寂寥屬吟甚苦一老僧云少年何不言樓觀滄海日門對浙江潮遂終篇跡之乃駱賓王也其二謂劉希夷去年花落顏色改明年花開復誰在延清愛而欲有之不許遂以土囊壓殺之夫落花句雖自妍宛要非至者延清自多佳境何至苦欲得之其與賓王年事不甚相遠賓王集又有江南贈宋五之問及兗州餞別詩何得言非舊識若賓王果爲老僧而之問後謫過杭時亦



且老矣不得呼少年止由二詩竝見集中而好事者欲以證希夷之橫死賓王之倖生故令延清受此長誣耳

傳奇稱徐敬業黃巢亦俱爲僧以免黃巢有鐵衣着盡着僧衣語又一說宋開寶中八十老僧道價爲叢林所重臨當歸寂從容示偈舒左足足底有黃巢二字又有載姚泓爲終南山地僊事極詳要之皆誣罔耳

羅虬比紅兒不過市井間烟花語耳然唐詩紀事謂虬手刃此伎而作詩追悼之恐誤蓋詩語有任伊孫

武心如鐵不辦軍前殺此人又若教麤及紅兒貌爭肯樓前斬愛姬也恐紅兒自以他故死不由手刃

史記年表秦以君公主妻河君主註以它女爲君主秦君之女也漢之子女曰公主壻曰尚諸王文曰翁主壻曰承

楊用脩證西施之沈江與陳晦伯之證西施隨范蠡以去俱各有所出難以臆斷第陳引吳地記句踐令范蠡取西施以獻夫差西施於路與范蠡潛通三年始達於吳遂生一子至此亭其子一歲能言因名語兒亭此大可咲按記亭在嘉興縣南一百里爲吳地



弁州山人稿卷之五十三  
范蠡爲越成大事豈肯作此無賴事未有奉使進女  
三年於數百里間而不露露而越王不怒蠡吳王不  
怒越者齊東野人之談何足據也攷越絕書曰語兒  
鄉故越界名曰就李吳疆越地以爲戰地至於柴辟  
亭女陽亭者句踐入官於吳夫人從道產女此亭養  
於李鄉句踐勝吳更名女陽更就李爲語兒鄉今稱  
女兒亭蓋誤合爲一也晦伯之駁用脩真可謂夢中  
說夢矣  
吳越春秋所載伍胥投水女溧陽然不知其人按李  
太白撰碑女姓史然則溧陽史在春秋已有之

用脩引符子云姓名人罕知況其書乎馬總意材亦  
不載下註云符子名朗東晉人見隋藝文志此亦不  
詳正史之故符朗不當作符按符堅載記後有朗傳  
堅之從兄子也秦亂投晉爲王國寶所構死著符子  
數十篇亦老莊之流此書今收藏經中余嘗讀之豈  
僻人僻書也

用脩云杜子美詩近來海內爲長句汝與東山李白  
好流俗本妄改作山東李白樂史序李白集云白客  
游天下以聲妓自隨效謝安石風流自號東山時人  
遂以東山李白稱之子美詩句正因其自號而稱之



耳流俗不知而妄改近世作大明一統志遂以李白  
入山東人物類而以杜詩爲證近於郢書燕說矣按  
南部新書云李白山東人父爲任城尉因家焉少與  
魯人隱徂徠山號竹溪六逸天寶初游會稽吳筠隱  
剡中谷稱蜀人非也今任城令廳有白詞尚存至唐  
范傳正誌其墓曰白涼武昭王九世孫昭王隴西人  
隋末子孫以罪徙西域神龍時白父客自西域逃居  
綿之巴西而白生焉唐魏顥李陽水序其文劉全白  
撰其墓碣皆曰廣漢人故論白者或曰隴西或曰山  
東或曰蜀李陽水云李翰林浪跡縱酒以自昏穢詠  
歌之際屢稱山東李白亦云以張垞讒逐游海岱間  
子美所謂汝與山東李白好蓋白自號也然則白本  
隴西人產於蜀嘗流寓山東子美從游時在山東故  
稱山東也此山東乃關東非今之山東也一統志固  
已俗然用脩亦所謂得其一未得其二者也

宋太祖詔天下重脩建帝王廟委州長吏躬親檢討  
儀相畫樣給付而中間有不相宜者秦始皇配有李  
斯漢景有周亞夫晁錯唐明皇有郭元振後唐莊宗  
有郭崇韜明宗有任圜安重進皆君臣不相終者也  
高辛以后稷配後魏孝文以長孫晟隋文時人不



相值也後周文帝以宇文憲憲少子文帝卒時僅十  
六不應配也明皇不配姚宋而配張說王琚肅宗不  
配李郭而配苗晉卿裴冕霍光兩配武宣而不祠昭  
帝秦始皇朱梁太祖石晉高祖俱不應祀而祀中間  
如夏少康周宣王昭帝皆賢主而皆遺之趙中令諸  
公不學之過也女媧氏無配楊用脩攷三臣娥陵氏  
及聖氏隨氏以志其陋

今天下府名太原府乃宋太宗以晉王升者也延安  
府乃哲宗嘗封延安郡王升者也肇慶府徽宗以端  
王由端州升者也襄陽府真宗嘗封襄王由襄州升  
者也慶陽府仁宗嘗封慶國公由慶州升者也建寧  
府孝宗封建王由建州升者也德安府神宗嘗爲安  
州觀察使升者也獨宋太祖卽位以宋州爲南京應  
天府而我高皇帝首下建康定大業遂亦名南京  
應天府其聯合有如此者

今人以椿萱擬父母當是元人傳奇起耳大椿氏八  
千歲爲春秋以擬父猶可萱引詩語言樹之背殊不  
切觀唐元微之詩萱近北堂穿土早宋丁會之草解  
忘憂憂底事則唐宋人必不以萱擬母也橋梓所謂  
橋仰而高梓俯而卑周公之所以撻伯禽也却又



元魏御史中丞最爲雄峻見崔暹高儼傳可紀然尚書省臣能禁止糾劾之孝文時中尉李彪以剛直聞事多專恣尚書左僕射李冲列其罪惡有司奏當大辟詔除名明帝初中尉元匡欲攻尚書令元澄澄奏其罪惡亦處死刑詔除名前後二十年内事也然冲與澄自劾虜匡後皆不久而卒事固有相類如此者○陶隱居載漢高祖以始皇三十四年於南山得一鐵劍長三尺銘曰赤霄大篆書卽斬蛇劍也及貴常服之光武微時在南陽鄂山得一劍文曰秀霸魏武帝以建安二十年於幽谷得一劍長三尺六寸上有

金字銘曰孟德王以見人主受命之徵按西京雜記云斬蛇劍長七尺晉太康中武庫火飛去又載石勒耕地得一刀銘曰石氏昌篆書然劉曜讀書管涔山有管涔王遣童子奉寶劍事見本載記而隱居不之及建安二十年武帝王業成矣此劍非所自創卽其下僞爲之以相鼓眩也

隱居又云漢平帝衍以元始元年歲次辛酉掘得一劍上有帝名因服之大篆書又宋順帝準昇明元年掘得一刀文曰上血光照一室帝竒之二年七月使楊玉候織女不得懼死用以弑帝所得亦非祥也然



是蒼梧王昱不當作順帝準

李涪謂唐世郊天祭地止於再拜其禮至重不可加而以婦拜姑章必四為非禮然則彼時不行四拜也方干處士每拜必三時謂之方三拜宋朱元晦孫為淮東提刑與顯者書必云萬拜時謂之朱萬拜皆可稱人妖

淮南王英布犯法黥後至有國遂稱為黥布五季周行逢為三鎮節度使加侍中宋狄青為使相俱少嘗黥面貴而不欲去其文今人但知狄而不知周也則而至將相者孫臏司馬臏自刎者鬻鬻拳自宮者豈不

○潘輿事今將母者通用之而不知潘以石崇事見法其母固同與其禍也及瓜事今以為得代之期而不知瓜期不得代連稱管至父繇此為亂也含鷄舌香乃侍中刁存以年老口臭令含之墓碑生金在賈梁道廟以為晉中興之兆而庾氏為滅族之候俱不為佳事也

車二馬為麗三馬為騾四馬為駟鼓三百三十三槌為一通鼓止角動十二聲為一疊昏鼓四通為大鼗夜半三通為晨戒旦明三通為發响

丹鉛錄稱後周靜帝令官人黃眉墨粧云引蓋黃無



限當山額又額黃無限夕陽山語爲証謂唐尚然又引荆公詩漢宮嬌額半塗黃以爲漢已有之詳語意乃是額間小黃壓耳非黃眉也若周天元帝禁天下婦人不得施粉黛自非宮人皆黃眉黑粧蓋眉不用黛而止用黃不欲其飾之美上等宮掖耳全非額黃意也亦非靜帝

傳咸傳攀蚊髯附蝟翼然則蚊亦有髯乎列子以燕角之弓糊蓬之箭射虱之心而懸不絕虱亦有心乎蠻觸之國在蝸角闔而伏屍數百里蝦邦蟻郡又不足言矣

丹鉛餘錄載古鑑銘二以爲唐人作按銘辭有長懸仁壽天子萬春語疑隋仁壽宮成於此鑄鏡也又如珠出匣似月停空當眉寫翠對臉傅紅亦似煬帝語○中國初無西瓜見洪忠宣皓松漠記聞蓋使金虜貶遼陰山於陳王悟室得食之云種以牛糞結實大如斗絕甘冷可蠲暑疾丹鉛餘錄引五代邠陽令胡嶠陷虜記云於回紇得瓜名曰西瓜其言與忠宣同以爲至五代始入中國按忠宣使虜乃稱創見則嶠嘗之於陷虜之日而不能種之於中國也其在中土則自靖康而後其在江南或忠宣移種歸耳



左傳孔悝之難太子懼下石乞孟魘敵子路以戈擊之斷纓子路結纓而死據論語隱義孟魘一曰狐黯以詐墜子路折股畏其目光不敢前曰請覆子之目子路以衣袂掩目遂殺之又師覺授孝子傳子路之子仲子崔欲報父讎殺狐魘告於夫子夫子曰行矣魘知之曰君子不掩人之不備須後日以蒲弓木戟與子崔戰而死然則狐魘蓋悔其詐殺子路而以死成子崔之孝者也事固不可信然亦足以少雪覆醢之辱矣

南史柳世隆由南充州都督遷護軍時尚書令王儉

為衛將軍脩下官禮甚謹世隆止之儉曰將軍雖存

弘眷如玉典何余嘗怪之以為衛將軍位在護軍將

軍上何以有此後攷晉六朝志乃知護軍官品雖卑

而於諸將軍有上下分蓋亦陳平護諸將之遺意也

○李延壽作李神儁傳云出見犬邢劭戲曰為是宋

鵲為是韓盧神儁應聲曰為逐承相東走為負帝女

南徂及作徐之才傳又云嘗與朝士出游遇羣犬競

走諸人試令目之應聲云為是宋鵲為是韓盧為逐

李斯東走為負帝女南徂其重複如此必有一譌

北史李氏傳即延壽撰蓋倣班固例與唐俱涼武昭



王嵩之後其載世系極詳然內云在秦者名興族爲將軍生子伯祐建功北狄封南鄭公伯祐子德德子信爲秦將虜燕太子丹信孫元曠仕漢爲侍中弟仲翔位太尉討叛羌於狄道陣歿葬狄道川史記李將軍傳所云其先自槐里徙居成紀實始此也仲翔曾孫廣云云按信於廣爲六世其敗於楚爲始皇二十三年稱信年少壯往及孝文之十四年僅五十八年而廣已用良家子與從弟李蔡俱爲武騎常侍計其年當與信等不應世次之多若此且南鄭公非秦爵漢太尉爲三公未聞年表之有李仲翔與翔之討羌而歿也以此知記述之不易

李世勣傳卒年八十六攷之碑七十六當以碑爲正也傳稱大業末世勣爲盜僅十七而勣以摠章二年卒至武德元年爲五十二年勣是時年蓋二十五也然則大業四年勣已爲盜矣傳載其訓弟語云年踰八十司馬通鑑云年將八十亦知其謬耳然至所謂年十二三爲亡賴賊逢人則殺亦似非實錄蓋勣十二三時爲隋高帝末年天下未嘗有大盜也

宋史樊師古本名若水字叔清卽南唐進士走北以絲繩量江面濶狹者也後至給事中戶部使嘗因召



對上問之曰卿名出何書對曰唐尚書右丞倪若水  
亮直臣竊慕之上咲曰可改名知古倪若水實名若  
冰知古學淺妄引以對人皆咲之余家宋板唐書資  
治通鑑倪實名若水非若冰也且倪字子泉豈得爲  
若冰乎脩史者歐陽玄不應孟浪至此且以是而咲  
師古能無爲師古所咲也耶

王翦傳將兵六十萬伐楚行請美田宅園池甚衆始  
皇曰將軍行矣何憂貧乎王翦曰爲大王將有功終  
不得封侯故及大王之嚮臣臣亦及時以請園池爲  
子孫業耳又云王翦子王賁與李信定燕齊地二世  
之時王翦及其子賁已死而孫王離擊趙項羽破禽  
離及攷二十六年瑯邪臺銘列侯武城侯王離列侯  
通武侯王賁倫侯建成侯趙亥倫侯昌武侯成倫侯  
武信侯馮毋擇以位次差之王離在季父賁前則離  
乃剪冢孫襲剪爵者也賁蓋剪之次子自以功封侯  
者也所謂有功不封者其時未定天下云耳及剖符  
而剪一子一孫爲功臣之首又當時列侯二人倫侯  
三人凡封侯者僅五人而李斯與蒙恬李信不與焉  
可謂嚴矣所謂成者其嬴姓耶



弇州山人四部稿卷之一百六十三

弇州山人四部稿卷之一百六十四

吳郡王世貞元美著

說部

宛委餘編九

乾坤鑿度載太古百皇闢基文籀氏有巢氏遠理徵

萌始有熊氏

即庖犧亦名蒼牙

繼老神氏

天英氏

天老氏混沌

氏天英氏無懷氏炎帝神農氏烈山氏帝皐氏老孫

氏公孫軒轅氏

三墳載太古之人皆壽盈易始三男三女以女生為

姓始三頭謂之合雄紀生子三世合雄氏沒子孫相



傳記其壽命謂之敘命記通紀四姓生子二世男女  
衆多羣多連逋是謂連逋紀生子一世通紀一姓是  
謂五姓紀男女衆多分爲九頭各有居方故號居方  
氏生子三十二世強弱相迫中有神人提挺而治故  
號提挺氏生子三十五世通紀七十二姓故號通姓  
氏有巢氏教人居巢穴積鳥獸肉聚草木實燧人氏  
教人庖食俱通姓氏後壽俱一太易伏羲氏燧人子  
也風姓號天皇太昊伏犧有庖升龍氏已前山墳連  
山易也人皇神農氏氣墳歸藏易也地皇軒轅氏形  
墳乾坤易也已上二則辭多穿鑿附會姑記以俟考

○帝王世紀載有巢氏一曰大巢氏姪人氏太昊庖  
犧氏一曰伏羲蛇身人首女媧氏與伏羲氏俱蛇身  
人首一號希是爲女皇皆風姓大庭氏柏皇氏中央  
氏卷須氏婁陸氏驪連氏赫胥氏尊盧氏混沌氏昊  
英氏有巢氏朱襄氏葛天氏陰康氏無懷氏凡十五  
氏皆世襲庖犧號按此則有巢氏在後矣

炎帝神農氏至榆岡凡八世合五百三十年

帝王之貌如伏羲女媧蛇身人首神農人身牛首戴  
玉英玉勝黃帝龍顏顛頊首戴干戈帝嚳駢齒帝堯  
鳥庭荷勝眉有八采豐下銳上帝舜黑色龍顏重瞳



大口手握襃馬虎鼻大口兩耳三漏首戴鈎鈐曾有大口手足文履吉又云長頸鳥喙湯豐下銳上珠庭哲而有髯倨身而揚聲臂有四肘文王龍顏虎肩曾有四乳武王駢齒秦始皇蜂準長目鷲鳥膺豺聲漢高祖隆準龍顏美鬚髯左股有七十二黑子光武隆準日角大口美鬚眉昭烈臂垂過膝頤見其耳晉武帝炎髮委地手過膝齊太祖道成龍頰鐘聲鱗文徧體梁武帝衍兩髀駢骨頂上隆起有文在左右手曰武陳武帝霸先日角龍顏垂手過膝齊神武歡目有精光長頭高顴齒白於玉文宣帝洋鱗身重踝周文帝恭方頰廣額美鬚髯髮長委地垂手過膝背有黑子宛轉若龍盤之形隋高祖龍顏長上短下額有五柱入頂目光外射有文在手曰王唐太宗龍鳳之姿天日之表宋太祖正黑色方面大耳

其間位方隅者項羽目重瞳子力能扛鼎喑鳴叱詫千人皆廢王莽侈口露眼赤睛大聲而嘶反膺高視瞰臨左右孫權紫髯方頤大口長上短下劉淵子聰俱猿臂淵鬚長三尺餘當心有赤毫毛三根長三尺六寸聰左耳毫長二尺非常光澤劉聰生而肩白鬚四尺餘慕容皝龍顏版齒慕容容手垂過膝符堅背有



赤文隱起成字曰艸付臣又土王臂垂過膝面有紫  
光慕容德額有日角偃月圭文魏什翼犍隆準龍顏  
立髮委地臥則乳垂至席

自古創業之君俱不利長子高辛氏顓頊長子帝摯  
不善崩弟堯代立陶唐氏帝堯長子丹朱不得立立  
舜有虞氏帝舜長子不得立立禹湯長子太丁未立  
而卒周太王長子泰伯文王長子伯邑考一肇王跡  
一剪商者也泰伯伯邑考皆不得立秦始皇長子扶  
蘇不得立立胡亥漢高帝長子惠帝立而絕文帝繼  
王光武長子東海王不得立立明帝魏武長子曹昂

戰沒立文帝孫堅長子策無後立權孫權長子和不  
得立立休司馬懿長子師無子立司馬昭宋武長子  
義符廢立文帝劉淵長子和廢四子聰代劉曜長子  
胤前沒虜止爲王符健長子廢立次子代石勒子弘  
爲虎廢石虎長子邃宣俱前僂慕容儁前子死次子  
暉立慕容垂長子令被殺次子寶立齊蕭太祖長子  
武帝立一世而絕從子繼之梁武帝長子昭明早逝  
次子簡文代陳武帝長子死於江從子蒨立北齊神  
武長子澄弒次子洋立周文長子安定公立而廢少  
子武帝立隋高祖長子勇廢次子煬帝立唐高祖長



子建成僂次子太宗朱梁太祖是長子友文墜馬死  
少子友貞立後唐太祖克用長子落落陣亡少子存  
勗立明帝長子從榮僂從厚立吳王揚行密長子澤  
廢次子隆演立南唐徐溫長子知訓以亂死義子知  
誥立蜀主王建長子元膺僂次子衍立南漢劉隱闡  
王潮子俱不立立弟後蜀孟知祥公主子在唐不得  
立立宋太祖長子德昭自殺弟太宗立太宗亦自  
作加長子元佐不得立立真宗契丹阿保機子東丹  
王不立立次子德光金阿骨打子蒲盧虎不得立  
立弟吳乞買元太祖長子先沒立次子憲宗世祖長

子真金與我

高皇懿文太子俱先歿然則由古及今創業之主其  
為嫡長子而得傳位及後人者僅禹子啟也亦異矣  
○尚書令本執政官至隋而重大業初僅楊素一人  
武德中冊拜太宗後絕不復設代宗朝加郭子儀固  
辭不敢當後邠寧帥王行瑜欲得之以子儀例不予  
加尚父太師賜鐵券然自是行瑜及李茂貞錢鏐王  
鎔馬殷高季興錢元瓘錢俶得為之皆藩鎮也楚王  
元佐鎮王元偓周王元儼皆宗室也大臣贈者以無  
兼官為重若趙韓王韓魏王是也



天策上將亦唐高特設以褒太宗者後加楚王馬殷  
馬希範皆開府如故事宋真宗加楚王元佐則虛稱  
也如周王元儼輩用以贈官北齊有贈假黃鉞至宋  
贈入朝不趨劍履上殿尤無謂

古官名有極賤而極貴者僕射有極貴而極賤者太  
師樂官之長也以文名武者漢昭文將軍儒林校尉以武

名文者唐有武學博士今名有俗而官則雅者庶子  
洗馬名有武而官則文者兵馬指揮名有文而官則

武者留守大而小者大使小而大者副使名與實不  
相蒙者祭酒古貴而今賤者宣撫招討巡檢古賤而

今貴者侍郎漢趙后通宮奴侍郎

偶見有辭上柱國者以為人臣無上不知此官始在

楚為勳官在令尹下諸卿上隋為從一品階官在唐

則為四品以上階官不足道也古今官名有非人臣

所宜稱者總百揆舜禹以後司馬昭炎桓玄劉裕蕭道成蕭衍高洋陳霸先楊堅李淵

宰衡漢王莽晉天柱大將軍魏爾朱榮後加

太上秦公魏胡無上王子魏邵兄宇宙大

將軍都督六合諸軍事梁侯天地太師成范尚父周

公望漢董卓唐郭子儀李景回天再造功臣朱全皇天

之下一人之上元帝安國相王睿鎮國大長公主睿



妹太平  
公主

相國丞相皆秦官秉政者太師太傅太保古三公後以爲三師位上公以太尉司徒司空爲三公故也相國自呂不韋蕭曹後罷不設至司馬昭父子以此慕魏後遂因之東漢有三公而無丞相曹操父子以此慕漢亦遂少置渡江之後惟王導會稽王昱以序遷者三師惟太師爲尊魏避司馬師諱改爲太宰高齊竝置而以太宰位太師上左右承相位太宰上然董卓以相國遷太師孔光以丞相宇文泰以大丞相遷太師大冢宰則又以太師爲尊也元帥卽漢太尉晉都督中外諸軍職也金爲都元帥權甚重而位在三公承相下元則至輕僅若今之指揮使耳至加以天下爲稱則亦非人臣所宜當也

相國魏司馬昭司馬炎晉司馬倫桓玄劉裕宋蕭道成齊蕭衍梁侯景陳霸先僞漢劉粲劉曜僞趙石虎石琨魏高洋後周楊堅唐朱全忠皆不久而成禪代者也

大丞相魏爾朱榮高歡宇文泰後周楊堅隋李淵契丹趙延壽韓德讓元伯顏

天下兵馬元帥唐肅宗代宗德宗皆以皇太子領



之朱全忠以梁王領之肅宗爲大元帥五代時錢鏐  
錢俶以吳越王領都元帥北魏初加爾朱榮柱國大  
將軍位丞相上後遂加天柱若徽稱然宇文泰在西  
魏與七功臣爲八柱國加者漸多至隋乃以上柱國  
爲崇加而柱國次之唐時上柱國品遂下至第四  
明興始復正之以上柱國爲正一品勳柱國爲從一  
品勳

漢列侯不與政而勳重者位特進後以大將軍鄧騭  
辭位加同三司之儀以後得開府辟僚屬又與三公  
俱開蕃閣故曰開府儀同三司羊征南位開府謙讓

不肯辟召是也魏晉之際太保王祥以睢陵公太保  
衛瓘以蘭陵公司徒魏舒以劇陽子老就第太保同  
保傅司徒同三司亦此意但不入官耳晉宋齊梁陳  
俱不輕受北魏爾朱世隆辭太保加同三師在三公  
上後周及隋改爲勳官在柱國下有三等曰上開府  
曰開府曰儀同至唐而始復故文皇之世唯尉遲敬  
德辭都督乃得加之位次房司空以後復爲階官之  
最其次特進國初亦因之然官至太尉司徒司空而  
曰儀同三司名實抑何舛也國初去開府儀同以特  
進光祿大夫冠正一品是矣然以公卿而稱大夫如



尚書再滿考階曰資德大夫勳曰正治上卿其勳階亦自相矛盾不可不改正也予嘗戲謂官至卿而稱大夫者尚書左右都御史也官止大夫而得稱卿者太常至尚寶也

左傳趙簡子代衛誓師曰克敵者上大夫受縣下大夫受郡杜氏註曰千里百縣縣有四郡當是時縣蓋統郡也按堯分天下爲九州舜益以十二州禹復爲九州其所統者五等之國耳自諸侯兼并地日益以大而始有郡縣之名秦孝公命商鞅分秦地爲四十一縣後并天下罷侯置守凡三十六郡而郡始改而統縣矣漢氏因之而兼有王國侯國武帝始復以十三州統郡國後設刺史權尊而秩卑若今之巡按御史至後魏末而刺史握兵益重遂爲州牧三國晉氏往往復設將軍督軍而州有不領郡者郡亦有不屬州者隋煬帝悉改州爲郡諸邑屬焉其大抵因秦之舊唐復以郡爲州而開元天寶之際又以兵興設節度使統之其不建節者爲觀察而亦有畿內如同華江左如蘇常不屬藩鎮者宋興藩鎮爲虛銜而實則以州領縣其得稱爲府者或以建立行都如魏州興唐或以天子藩封建節如宋州歸德府之類蓋小則



為州為軍大則為府自故相以及曹郎皆得次第任之重者判輕者知而南渡之後又設招討制置安撫以彈壓之上而宣撫尚得兼領州府蓋又隱然唐舊矣元始以府領州縣府之大者為路縣之大者為州而州又有領縣者又為行省以分轄之軍事兼屬焉兵興之際或設行樞密院事定則否大省則有行御史臺小者有肅政廉訪使

國朝因之罷路悉為府後降行省為布政司行樞密院為都指揮司行臺廉訪總名之曰按察司以網維郡縣後以遠不相及復設守巡兵備分理之又以三司不相聯屬歲命御史稽察之巡撫都御史以督攝之而府體益卑矣今之異於古者州屬府府之上為監司監司之上為臺察而又有小未安者既云州而又云府名所當改定也元以行中書省故名各省今兩畿曰南北直隸則各省當云某司隸可也

秦雖廢封建而功臣亦有一二封侯者見於嶧山之累諸碑可攷凡列侯倫侯二等如王離王賁之類列於右丞相去疾上自漢以列侯為丞相武帝以丞相封侯至霍光廢昌邑王之奏而御史大夫誼列於四嗣侯上矣然九卿猶在下也自後有子侯有小侯職



日就卑而章服猶如故按漢有王侯而無公其封王者不以一字二字分等第至曹操封魏公進封王而後禪代之主皆取法矣

魏末定五等封郡公縣公郡侯縣侯伯子男開國者皆金印紫綬關內侯在子男下猶金紫至關外侯則銀青矣皆世襲晉及六朝因之自郡公而上開國則易姓之漸也

元魏及北齊不愛王爵而有功則別封郡公侯至有帶三四爵者然同姓異姓皆不得封國王而郡縣公侯益卑矣後周宇文泰辭安定王遂爲安定公終身而其子嗣位進封功臣爲晉趙燕宋等國公而無郡王隋氏因之然郡縣公侯而下益多且賤不足計也唐以天子子弟封一字王稍疎而有功者如淮南趙郡江夏王之類文武功臣如趙國公無忌梁國公房玄齡之類皆得世襲蓋自周而至唐異姓不王矣然國公郡王皆從一品也後至玄宗封安祿山爲東平郡王以後王爵遂輕而兵馬押牙亦有封王者矣然文臣不王如故也天寶以後王公亦不得世襲而末年藩鎮強威逼帝室以王公不足重而朱全忠李茂貞李克用皆眞王矣宋興復承唐之舊而親王郡王



以宗室敘封公侯伯以文武臣第加不以功而以資  
然異姓猶不得王至徽宗舉以封童貫而南渡後張  
韓遂因之秦檜韓侂胄以執政封矣元承遼金之後  
王爵尤易真王卽將相可得之 明興始定爲之等  
天子之子弟封親王親王之子弟爲郡王皆自天子  
而下近於君者也開國公得贈王自侯而伯皆在正  
一品上雖師傅之尊班不得竝矣蓋略採漢氏之意  
而加詳雖襲唐宋之名而加貴者也

占之封戶有極異者漢以城邑封侯初自二百餘戶  
至萬戶其一邑之徭賦悉予之子孫能休養生息者  
或數倍於初高齊以後封爵侈而戶口不繼於是別  
立真食之數大槩十之一二耳封祿止是調絹量戶  
而計然皆不入御也至宋則止食本官之祿而戶封  
實封皆以入銜爲羨觀而已歷代官制無如宋氏猥  
雜甚至勳階銜位十餘條不知實職所在元豐稍有  
次序亦未盡善

設官慕古而不經者無如新莽其次宇文周莽以宰  
衡安漢公攝帝以王舜爲太傅左輔甄豐爲太阿右  
拂甄邯爲太保後承卽真後封子安新嘉辟諸孫爲  
功隆功明等公以舜爲太師封安新公平晏太傅就



新公少阿羲和劉歆國師嘉新公布衣哀章國將美  
 新公為四輔位上公甄邯大司馬王尋大司徒王邑  
 大司空為三公甄豐更始將軍布衣王興衛將軍孫  
 建立國將軍布衣王盛前將軍俱封承新章新等公  
 凡十一公又倣堯典四星四嶽以命四輔月刑日德  
 斗平以命三公更大司農曰羲和又曰納言大理曰  
 作士用詐字太常曰秩宗大鴻臚曰典樂少府曰共  
 工水衡都尉曰予虞用予字光祿勳曰司中太僕曰  
 太御衛尉曰大衛執金吾曰奮武中尉曰軍正又置  
 主乘輿服御官曰大贅皆上卿郡太守曰大尹都尉

曰大尉縣令長曰宰御史曰執法公車司馬曰王路  
 又有五侯將帥左伯右伯東通靈將五司大夫太子  
 有師疑傅丞阿輔保拂胥附犇走先後禦侮又有師  
 友祭酒俱秩上卿又置卒正連率大尹職如太守屬  
 令屬長職如都尉置州牧部監二十五人見禮如三公  
 公監位上大夫各主五郡公作牧侯作卒正伯連帥  
 子屬令男屬長皆世有官無爵者為尹分長安城旁  
 六鄉置帥各一人分三輔為六尉部河東河內弘農  
 河南潁川南陽為六隊帥置大夫職如太守屬正職  
 如都尉更名河南大尹曰保忠信卿緣邊又置竟尉



以男爲之宇文氏建六官其小冢宰以下至大夫上士一依周制而不能正其職也天元增設大前疑大後丞大左輔大右弼後楊堅執政復有左右大丞相三公六官併疑丞而下凡十五公矣

先爲道士仕宦者唐侍中魏徵丞相盧程先仕宦後爲道士者唐禮部侍郎賀知章又河南參軍鄭銑朱陽丞郭德舟以獻詩罷官度爲道士

先爲僧而蓄髮仕宦者宋湯惠休唐賈島蔡京先仕宦而削髮爲僧者南齊劉勰梁劉之遴張纘宋饒德操皆名士也勰即著文心雕龍者法名慧地一年而

卒纘爲執政方岳之遴官禁秘以侯景亂削髮尋皆爲湘東王所醜死又北魏元太興以西河王衛尉卿削髮名僧懿

爲僧爲道而舉進士者唐劉軻前後仕宦而中爲道人者梁伏挺爲行者唐徐安貞挺安貞皆以居官有罪懼發故也

由僧徑拜大位者唐左衛大將軍梁國公懷義元太保參議中書省劉秉忠明太子少師姚廣孝懷義嬖倖不足言秉忠廣孝皆名臣廣孝不蓄髮不婚娶

由道士徑拜大位者唐嵩山于什方爲正諫大夫同



舟州山人稿 卷之百三十四 世經堂刻  
中書門下平章事葉靜能爲國子祭酒鄭普思爲秘書監尹愔爲諫議大夫仍以道士服治事明邵元吉爲禮部尚書陶仲文爲少師恭誠伯

有內職而移爲將相者中書令樞密使漢官兼內外人者將行卽大長秋有內臣而真爲宰相者秦丞相趙高魏太師大司馬都督中外諸軍錄尚書馮翊王宗愛唐尚父司空中書令博陸王李輔國南漢太師內樞密使龔托宋太師領樞密院事廣陽王童貫少保梁師成元大司徒領中書左丞相李邦寧有儒臣而入爲內臣者太史公司馬遷爲中書令有內臣而出領儒臣者內侍監魚朝恩兼判國子祭酒南漢至狀元及第及雅士名儒俱先下蠶室而後得入用事抑何不幸也

欒巴初以天闈爲中黃門後陽道開通自言出列卿郡張平養子通於平妾因自割其勢後事符堅至大將封侯號萬人敵史不載其割勢事見十六國春秋楊素弟約少爲查所傷遂成宦者後爲內史令封郡公而無子樊叔略長九尺被腐爲高氏給使殿省走周累典大郡封清鄉縣公謚曰襄見循吏傳

女子改國號稱帝者女媧氏周武氏稱制者漢呂后



女子封侯者女列侯陰安侯漢高祖丘嫂鳴雌亭侯  
許負魯侯底氏子奚涓死事無子母封十九年薨已  
上高祖封臨光侯呂嬃高后封鄴侯蕭何子嗣侯祿  
薨高后封何天人爲鄴侯

女子爲女官者女侍中後魏元義妻胡氏齊高岳母  
山氏趙彥深母傅氏南漢盧瓊僊女尚書魏明帝選  
知書女子爲之女學士唐德宗朝貝州宋氏五女若  
萃若昭若華若倫若憲陳後主時宮人袁大捨等女  
博士宋孝武朝韓蘭英

女子爲男官者女將軍晉王廞起兵顧深母孔氏年  
百餘以爲軍司馬廞復以已女爲貞烈將軍唐行營  
節度許叔冀以衛州女子侯氏滑州女子唐氏青州  
女子王氏軟血赴義奏授爲果毅陳女白頸鷗爲契  
丹懷化將軍侍夫數十人

女子執國政者齊陸太姬司綸縉者唐上官婕妤司  
史事者漢曹大家主兵者唐平陽公主洗夫人

女子詐爲男子而有官位者齊揚州議曹錄事婁逞  
唐昭義軍兵馬使國子祭酒石氏朔方兵馬使御史  
大夫孟氏蜀司戶叅軍黃崇嘏楊升菴詩話又有女  
校書薛濤女進士林妙王濤乃稱謂之詞妙王宋女



童應試封孺人

封爵有故加以惡名者頡羨侯劉信一本曰曰羨  
侯高帝微時過信其母曼金以郤帝故也不義侯子  
密蒼頭子密弒其主彭祖故也悖義將軍佞濁子符  
承祖元魏倖臣以罪斥故也違命侯李煜宋以其不  
降附故也它如宥罪歸命恩赦之類亦多以降附封  
者若紂世鬼侯漢曲逆侯陳平挾術侯劉昆皆以國  
邑鄉名封而不佳

漢又有劫節執節挾釐稻夷有利烏氏薪館沈猷參  
驪栗節浹夷柳裴蘭旗蒲領平慕即來麗茲擗頃橐

祖汁防汁音什防音方闕氏沔陵南郎陸量土軍煮

棗下摩輝渠濕陰河綦衆利潦癸南奔發干○鱸○

蕢○餅○獠○卽○鹵○楛○軼○臙○芒○旣非

郡邑而字義頗不明了疑卽鄉亭名也

魏武有發丘中郎將模金校尉見陳琳檄宋廢帝復

設此官漢西域有僮僕校尉

諡法白虎通卿大夫有爵故有諡士無爵故無諡春

秋之世周齊晉衛君及卿有諡大夫無諡若羊舌肸

祈奚蘧瑗之類俱無諡也魯大夫亦有諡如臧文仲

邠昭伯之類俱有諡也秦楚宋鄭卿無諡如百里奚

齊州山人稿卷之百六十四



孟明子文孫叔華元子罕子皮子產子太叔之類俱  
無謚也吳越君臣俱無謚如闔閭句踐之類俱無謚  
也戰國君有謚臣無謚秦有天下君以世臣無謚漢  
制列侯比於春秋有謚其無爵者不謚故西漢之世  
雖嗣侯亦謚也東漢之世雖三公亦不謚也晉渡江  
而後用司徒導言命公卿無爵而賢者亦予之謚無  
爵而謚自東晉始也處士之有謚自符秦之於張忠  
公孫永始也其有私謚也則自春秋黔婁始也婦人  
從夫之謚也其別謚者則自周穆王之哀淑人始也  
臣有三謚則衛侯之於公叔貞惠文子也生而預謚  
則衛侯之於北宮貞子齊朱成子也戰國之臣死無  
謚然生而有美號者武信武安剛成諸君文信侯之  
類是也春秋之世出生犇而仕他國者有謚如臧武仲  
中行文子之類是也崔杼欒盈身為僂矣族已滅矣  
豈其故臣而爲之謚抑左氏自立之也

謚法所不載者恬漢牧丘侯石慶辟周宋辟公虎相  
支切虎之有角者漢廣陵侯劉棻蕩周晉國公宇文  
護瘦周衛侯姬某瘡周齊侯呂慈母赧周天王延淵  
明太子少保徐善述範漢陳文範寔謚昌元易國武  
昌公何伯祥慧比魏廣陵王元羽一唐銀青光祿大



夫司馬貞一公承禎傑金梁國傑忠公大臯齊宋尹  
國孝齊公趙克脩靚周慎靚王

有謚而無釋義者彊梁光祿大夫江革尅北漢定陶  
男慕容契傾唐左散騎常侍房式愷周康國公柳帶  
韋異周大右弼代王宇文達方周姑臧公令狐瑾道  
遼道宗洪基興遼興宗宗真熙金熙宗亶我 明熙

祖淳我 明淳祖哲宋哲宗徽宋徽宗寧宋寧宗又

秦寧公明中山武寧王達制漢高遠侯丙猜崩成侯

周滌祗漢衍侯翟山恒我 明恒皇帝敷漢定侯劉

越柳侯劉罷師崇漢崇帝桓帝夏崇宗乾順慶南唐

慶宗李榮後周慶祖郭簡敢唐武都公權萬紀頌漢

臯虞侯劉顯宜梁梁都侯韋放穀漢祁侯繒賀式漢

士軍侯宣義代唐代宗勝漢河陵侯郭容衍漢邯會

侯劉仁賁漢戚侯季長申周陳侯媯犀侯于漢柳侯

劉自為安郭侯劉傳富息漢盧水侯劉爵冲漢冲帝

晉宋十四王野周大前疑越王宇文盛聞周滕王宇

文適僭周右大承相趙王宇文招專唐尚書宋慶禮

初謚繻周鄭伯姬駘替梁上黃侯蕭擘脫陳西豐侯

周敷閻周太子太傅斛斯徵利周陳侯媯曜驕梁中

書令蕭子顯蔡高陽公許敬宗刻漢成安侯郭賞或

齊州山人稿卷之百六十四 十九世經堂刊



周陳王宇文純義明高文義毅康武義茂才靜北魏  
靜帝又李文靜憲略宋賈武略達元張武略弘靖初  
謚釋義謀略計畫也可以證楊用脩之謬真宋真宗  
周魯侯姬湏晉蘭陵世子衛恒考周王嵬魯侯姬酉  
漢平昌侯王接菑川王劉尚等四人玄唐玄宗 明  
玄皇帝博唐陳國公竇抗仁漢一皇宋元 明三宗  
一祖隋唐國公李昫慎周衛侯姬頽陳侯媯圉戎漢  
輝渠侯應疋寬梁廣信侯蕭映素宋宣德郎徐節素  
積初謚濟金都國定濟公完顏謾都訶禰唐宋國蕭  
貞禰公瑀智元武都智敏王孟速思

有謚忠孝者唐太原王武士釁郇國公韋陟也有謚  
文質者宋博羅主簿羅從彥也

糠今謚法不載而漢中山靖王孫昆侈嗣王薨謚曰  
糠音與糠同惡謚也好樂怠政曰糠又有安陽侯劉  
延被陽侯劉偃臯虞侯劉定謚亦同

天子爲臣下作碑者唐太宗爲魏徵高宗爲李勣玄  
宗爲張說德宗爲段秀實宋太宗爲趙普仁宗爲李  
用和神宗爲韓琦 國朝

太祖爲徐中山達 太宗爲姚恭靖廣孝  
孝宗爲張昌公巒而已



古有稱金貂者常侍侍中插貂以金爲柱也漢稱金紫者金印紫綬也其後江左入銜曰金紫光祿銀青及金魚袋後元復以金紫銀青入銜國初亦因之印在秦漢以爲佩服之章至六朝尚因之故至小其丞相列侯不過寸餘不以施奏牘也唐用龜魚以代印而印用之奏牘矣至明而印之寸分加大矣明之所謂綬非綬制也芾也其牙牌則以代印及龜魚也古王公列侯皆金印丞相將軍亦金印今法親王金寶一二品銀印餘皆銅印古印列侯存者多銅印人不能曉所謂按古賜印外許得自製銅木牙印蓋倣印製而爲之金銀印不能存而銅獨得存故也

唐時將相告身用金花五色綾紙至宋則用織成花綾以品次有差宋勅俱草書後用三省長官僉押尚書印然無御寶當時每授官則有之至國朝考最始給與一品至五品皆誥六品以下勅花色殊異公侯一品玉軸伯及二品犀軸三品四品鍍金軸餘角軸內唯御寶加於年月之上其特使則有勅勅用小龍墨欄黃紙



舟州山人四部稿卷之一百六十四



